



Jupiter at quoscumque odit male per vaga ponti
 Aut freta, terrarum vasta per aut spatia,
 Pieriæ inlecebras oderunt vocis; & acer
 Cœus, & Iapetus sub Styge, & Enceladus;
 Quique olim eductus Cilicum sub rupe [a] **Typhœus**
 Nunc Cumis, nunc & litoribus Siculis
 Subpositus graviter premitur. Sua pectora fetis
 Hispida cœlesti mole gravat cohibens
 Ætna pruinosa semper nivis horrida nutrix,
 Quæ, dum Sol rutilat clarus in axe, sinu
 E rabido picea fundit caligine nubem:
 Mox idem, quam se Tethyi restituit,
 Purpureum ejectione ignem, flammantia volvit
 Terrifico rapidum saxa sono in pelagus.
 Ardet inextincto volcania gurgite sedes,
 Aestuat horrendis ignea vorticibus,
 Spectaclum infelix, mirum: seu viderit ullus,
 Seu narrantem etiam fors alium audierit,
 Subter ea ut jaceat vinctus, duroque cubili
 Ille miser curvatum adterat usque latus.
 O mihi sit placuisse Jovique, & cœlitibus Dis,
 Quos & flos cantus, flos juvat & citharæ:
 Ingemat Ætnea frustra sub rupe Typhœus.
 Non mi etenim Scythico corda rigent chalybe,
 Sæva nec admovit mi nutrix ubera tygris,
 Non Syrtis, non mi Scylla vorax genuit.
 Cantum amo, Musarumque choros: me me bona vidit
 Nascentem haud lævo lumine Calliope.
 Nam velut aerio subluces tramite nubes,
 Aut vento, aut radiis percita Apollineis,

(a) Virgilius quidem lib. III. Æn., & P. Cornelius Severus sub
 Ætna collocant Enceladum: at Pindarus Pyth. od. I. non
 Enceladum sed Typhonem, qui & Typhœus, Ætna in Si-
 cilia premi affirmat.